

Msaada wa Karibu Siku Zote

BWANA ni mwema, ni ngome siku ya taabu; naye huwajua hao wamkimbiliao. Nahumu 1:7.

Tunazo ahadi nyingi katika Neno la Mungu, iwapo tu tutamwamini na kumtumaini Yeye. Tuko katika hatari ya kuamini juhudi zetu duni za kibinadamu na wala si kuweka tegemeo letu kwa Mungu. Kila mtu ambaye ana sehemu yoyote ya kutenda katika maandalizi haya makuu ya kazi ya Mungu kwa siku hizi za mwisho anapaswa kumkaribia Mungu. Mungu anapowatuma wafanyakazi Wake kufanya kazi maalumu kwa ajili Yake, ameahidi kuwa pamoja nao, ikiwa watakuwa pamoja na Mungu. Lakini wakijitenga na Mungu na kujaribu kufanya kazi hii kwa nguvu zao wenyewe, watakutana na shida na kukatishwa tamaa katika kila hatua. Hapa tunayo ahadi kwamba katika kumfanyia Bwana kazi, Yeye yu upande wetu wa kuume kutusaidia na kufanya kazi pamoja nasi.

Itakuwa ni upumbavu mkuu mno ulimwenguni kwa yeyote kati yetu kujichukulia sifa zozote kwetu wenyewe kwa mafanikio yoyote yale ambayo tunaweza kuwa nayo. Kadiri tunavyoenenda kwa unyenyekevu mbele za Mungu, ndivyo atakavyojidhihirisha zaidi kwetu ili apate kutusaidia. Bwana hakuwahi kamwe kukusudia kuwatuma watumishi Wake kufanya kazi kwa ajili Yake huku upinzani wote wa Shetani na malaika waovu ukiwa dhidi yao isipokuwa amewapa msaada kutoka kwa Mungu. Sababu ambayo inafanya tusiwe na mafanikio makubwa katika kazi ni kwamba tunategemea juhudi zetu wenyewe badala ya msaada ambao Mungu atatupatia. Ni fursa kwetu kujisikia udhaifu wetu, kutokustahili kwetu na kisha kudai msaada ambao Mungu ametupatia. Tunaweza kuchukua Neno katika dhiki yetu na huku tukihisi mzigo wa roho juu yetu na kusema, "Hapa, Bwana, Umeahidi nami ninaliamini neno Lako." Ni lazima tujifunze kumwendea Baba yetu wa mbinguni kama vile mtoto anavyowaendea wazazi wake wa duniani. Anasema "Au kuna mtu yupi kwenu, ambaye, mwanawe akimwomba mkate, atampa jiwe? Au akiomba samaki, atampa nyoka? Basi ikiwa ninyi, mlio waovu, mnajua kuwapa watoto wenu vipawa vyema" kwa nguvu hizijifanyieni kila kitu ambacho kinawezekana kwenu kufanya, kisha kabidhi mengine yote kwa Mungu.